

SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaata allannguutissaatut siunnersuut

(Ineqarnermut, Attaveqaasersuutitut Isorliunerusunullu Naalakkersuisoq)

Saqqummiussisut

(Ineqarnermut, Attaveqaasersuutitut Isorliunerusunullu Naalakkersuisoq)

Siullermeerneqarnera

“SIKUKI Nuuk Harbour A/S aamma Nuummi umiarsualiviliorneq pillugit Inatsisartut inatsisaata allannguutissaatut siunnersuut”-mi (Sikuki pillugu inatsit) SIKUKI Nuuk Harbour A/S-ip Nuup avataani umiarsualivinnik pisisinnaanissamut ingerlatsisinnaanissamullu inatsisitigut tunngavissinneqarnissaata qulakkeerneqarnissaa siunertarineqarpoq. Taamaalilluni Kalaallit Nunaat tamakkerlugu SIKUKI Harbour A/S-ip umiarsualivinnik ingerlatsinermi misilittagai immikkullu ilisimasai iluaqutigineqarsinnaalissapput. Ingerlatseqatigiiffiup Nuummiinnaq sullissiunnaarnera ersarissarniarlugu, SIKUKI Nuuk Harbour A/S-ip akka Sikuki Ports A/S-imut allanngortinneqarpoq.

2021-mi Namminersorlutik Oqartussat umiarsualiviutaanni aserfallatsaaliuinnermut kinguaattoorutit 2021-mi 270 mio. koruuniupput, tamanna aningaasaqarnikkut periarfissanut naleqqiullugu piffissami qaninnerpaami piviusunngortinneqarsinnaangilaq. Namminersorlutik Oqartussat pigisaat umiarsualiviit toqqakkat aalajangersimasut Sikuki Ports A/S-mut tunniunneqarpata, Sikuki Ports A/S-ip umiarsualiviit ingerlatsinerat aammalu aserfallatsaaliinerat niuermik tunngaviusunik isumaqatigiissutit naapertorlugit isumagissavai, soorlu Nuup umiarsualiviani ingerlatsinermi takuneqarsinnaasoq. Taamaalilluni umiarsualiviit pineqartut niuermik tunngaveqarluni aammalu Nunap Karsia aningaasartuuteqartinngikkaluarlugu aserfallatsaaliorneqarnissaat iluarsaanneqarnissaallu qulakkeerneqarsinnaalissaaq.

Aningaasat, maanna Aningaasanut Inatsimmi immikkoortinneqartut atorlugit kinguaattoorutit naammassineqarnissaat periarfissaqanngilaq. Nalinginnaasumik qanoq issutsimik nalunaarsuinnermut atatillugu talittarfiit sannaasa ilui naliliiffigineqarsinnaanngimmata, 2021-mi naatsorsukkanut naleqqiullugu aserfallatsaaliuinnermi kinguaattoorutit inernissaat allanngorarsinnaapput.

Sikuki pillugu Inatsisartut inatsisaanni ingerlatseqatigiiffiup siulersuisuini ilaasortanut qullersaqarfianullu piumasaqaatit arlallit aalajangersarneqarput. Taamaattumik Sikuki-p qullersaqarfia inunniit piginnaaneqartunit tapersersorneqarpoq, ingerlatseqatigiiffiup periusissiornikkut anguniagaasa, ingerlatseqatigiiffimmut piginnittunit siunnerfigineqartut anguneqarnissaannut tapersiisinnaasunik.

Sikuki Ports A/S-ip Nuup avataani umiarsualivinnik pisinissamut ingerlatsinissamullu inatsisitigut tunngavissinneqarnerani, Sikuki Ports A/S-ip umiarsualivinnik ingerlatsinermik misilittagaasa immikkullu ilisimasaasa tamanit iluaqutigineqarsinnaalernissaat iluaqutaassaaq. Iluaqutissaq taanna innuttaasunut tamanut iluaqutaasussaavoq.

Umiarsualiviit Namminersorlutik Oqartussanit pigineqartut toqqakkat Sikuki Ports A/S-imut tunniunneqarnerisigut aserfallatsaaliuinissamut kinguaattoorutit angummaffiusinnaapput, Sikuki-p umiarsualiviit toqqarneqartut niuermik tunngaveqarluni ingerlassinnaammagit.

Taamaattumik Sikuki pillugu inatsimmut allannguutissaq akuerineqassasoq qularinngilluinnarpara, taamaalilluni Sikuki-mi piginnaasat kinguaattoorutit, ullumikkut Nunap Karsianut artukkiingaatsiartut peerneqarnissaannut atorluarneqarsinnaassammata.